



(2. tölublað 2016)

Velheppnað afmælisþing ÍA

Þann 3 maí s.l var glæsilegt 70 ára afmælisþing Íþróttabandalags Akraness haldið í félagsaðstöðunni að Jaðarsbökkum. Þetta þing er það 72. í röðinni frá upphafi. Félagstarf ÍA er nú í miklum blóma og átján aðildarfélög bandalagsins ganga í takt við að efla fjölbreytt íþróttastarf og almenna heilsueflingu á Akranesi. Þinghald gekk vel fyrir sig og mikil samstaða meðal þingfulltrúa að halda áfram á sömu braut.

Ársþing ÍA var allt hið glæsilegasta og auk hefðbundinna dagskrárliða á þingum var boðið upp á skemmtiatriði. ÍA kórinn kom í fyrsta skipti fram en hann skipa börn sem æfa og keppa í hinum ýmsu aðildarfélögum bandalagsins. Hópurinn klæddist keppnisbúningum síns félags og söng saman lögin, Kátir voru karlar og Ég er komin heim undir öruggri stjórn Valgerðar Jónsdóttur. Glæsilegt atriði og var ekki laust við að margir fengju gæsahúð af hrifningu.

Seinna skemmtiatriðið sem boðið var upp á var einnig stórglæsilegt en það var söngur og undirspil ungra og efnilegra tónlistamanna er einnig æfa hjá ÍA. Þetta eru þau Halla Margrét Jónsdóttir og Símon Orri Jóhannsson sem gert hafa garðinn frægan í Ísland got talent og víðar.



Helga Sjöfn fyrsta konan til að verða formaður ÍA

Fyrir þingið lá að nokkur endurnýjun yrði í framkvæmdastjórn ÍA. Sigurður Arnar Sigurðsson gaf ekki kost á sér til endurkjörs sem formaður og þau Birna Björnsdóttir, Sigurður Elvar Þórólfsson og Brynjar Sigurðsson gáfu ekki kost á sér til áframhaldandi stjórnarsetu fyrir komandi kjörtímabil.

Helga Sjöfn Jóhannesdóttir sem gengt hefur hlutverki varaformanns síðast liðin tvö ár bauð sig fram sem formaður og var hún kjörin í forsæti með dynjandi lófaklappi þinggesta. Helga Sjöfn er þar með fyrsta konan í sögunni til að gegna formennsku í Íþróttabandalagi Akraness.

Helga Sjöfn er 31 ára gömul sjúkraþjálfari og á langan feril sem farsæll íþróttamaður í knattspyrnu, sundi og badminton. Helga Sjöfn hefur einnig verið virk í félagsstörfum innan íþróttahreyfingarinnar og gengt þar mörgum ábyrgðarstöðum. Glæsileg og öflug ung kona sem á framtíðina fyrir sér.



Ný framkvæmdastjórn ÍA 2016 - 2017

Eins og fyrr segir mun Helga Sjöfn Jóhannesdóttir vera formaður en auk hennar voru eftirtaldir kosnir í framkvæmdastjórn ÍA fyrir komandi starfsár. Sigurður Arnar Sigurðsson, Karitas Jónsdóttir, Svava Huld Þórðardóttir og Marella Steinsdóttir, til vara voru kjörnir Þráinn Haraldsson og Pálmi Haraldsson.



Öflugt íþróttastarf

Sigurður Arnar fyrrverandi formaður og Helga Sjöfn formaður fluttu í sameiningu ársskýrslu ÍA fyrir liðið starfsár. Í ræðu þeirra var víða komið við og getið margvíslegra atriða sem bandalagið vinnur eftir. Nær það starf til bæði afreksstarfs og uppeldisstarf í bæjarfélaginu. Liðið starfsár var gott ÍA ár eins og sjá má á öllum sviðum íþróttastarfs á Akranesi. Akurnesingar eignuðust Íslandsmeistara í hinum ýmsu íþróttagreinum og félagsstarfið er í miklum blóma. Þá hefur starf ÍA sjaldan eða aldrei verið öflugra og nú átján og brátt nítján aðildarfélög sinna þróttmiklu íþróttastarfi á Akranesi. Klifurfélag Akraness er átjándi aðildarfélag ÍA og Sjósiglingafélagið hefur óskað eftir að vera það nítjándi en það er nú í ákveðnu inngönguferli.

Á liðnu starfsári stóð ÍA m.a. fyrir glæsilegu landsmóti í golfi, fjölda kappleikja í knattspyrnu, glæsilegum fimleikamótum, sundmótum og hestamannamótum. Íþróttabandalagið hefur staðið að margvíslegum framkvæmdum þó nýframkvæmdir séu enn á bið. ÍA hefur ráðist í ýmsar endurbætur á íþróttasvæðum og aðstöðu hinna ýmsu aðildarféлага. Keppnissvæði í vélhjólaíþróttum er í dag með því glæsilegasta á Íslandi, hið sama má segja um uppbyggingu á skotsvæði, klifuríþróttum, hnefaleikum og kraftlyftingum. Uppgangur keiluíþróttarinnar er ævintýrlegur og sama má segja um fimleikana og körfuboltann. Mikill uppgangur er í almennri heilsuefningu og ný aðildarfélög með nýjar íþróttagreinar eru í vexti.



Halldór Jónsson sæmdur gullmerki ÍSÍ

Ingí Þór Ágústsson fulltrúi ÍSÍ ávarpaði þingið og færði ÍA afmælisgjöf frá ÍSÍ. Hann notaði tækifærið og sæmdi Halldór Fr. Jónsson gullmerki ÍSÍ fyrir hans áratuga störf í þágu íþróttahreyfingarinnar á Akranesi. Halldór, eða Dóri Jóns eins og margir nefnda hann hefur starfað sem þjálfari, stjórnarmaður í fjölda nefna og ráða, verið sjálfboðaliði í óteljandi verkefnum ólíkra íþróttafélaga og dyggur stuðningsmaður ÍA í áratugi. Halldór er svo sannarlega vel að þessum heiðri kominn og óskar framkvæmdastjórn ÍA honum innilega til hamingju með gullmerkið.



Fjórtán félagar heiðraðir með Bandalagsmerki ÍA

Íþróttabandalagið sæmdi eftirtalda einstaklinga bandalagsmerki ÍA sem viðurkenningu fyrir langt og farsælt starf tengt íþróttamálum á Akranesi: Laufey Sigurðardóttir, Erna Sigurðardóttir, Anna Guðbjörg Lárusdóttir, Guðmundur Sigurðsson, Jónína Magnúsdóttir, Katrín Leifsdóttir, Heiðbjört Kristjánsdóttir, Grétar G. Guðnason, Hildur Karen Aðalsteinsdóttir, Ólafur Óskarsson, Jóhannes Helgason, Jón Þór Þórðarson, Petrea Emilía Pétursdóttir og Gunnlaugur Sölvason.

Við óskum öllum þessum aðilum til hamingju með verðskuldaða viðurkenningu fyrir langt og farsælt starf fyrir ÍA.

Úthlutað úr Minningarsjóði Guðmundar Sveinbjörnssonar

Þrír afreksíþróttamenn hafa fengið úthlutað afreksstyrk úr Minningarsjóði Guðmundar Sveinbjörnssonar. Minningarsjóðurinn var stofnaður af íþróttabandalagi Akraness í virðingar- og þakklætisskyni fyrir hin veigamiklu störf Guðmundar í þágu Íþróttabandalags Akraness, íþróttá- og menningarmála. Þeir þrír afreksmenn sem hlutu styrk að þessu sinni eru Ágúst Júlíusson, sundmaður og íþróttamaður Akraness 2015. Valdís Þóra Jónsdóttir, kylfingur en hún lenti í öðru sæti í kjöri íþróttamanns Akraness. Egill Guðvarður Gunnlaugsson, baðmintonmaður en hann hlaut þriðja sætið í kjöri íþróttamanns Akraness. Við óskum þessum afreksíþróttamönnum til hamingju með viðurkenninguna.



Akraneskaupstaður færir ÍA gjöf og styrkir Minningarsjóð Guðmundar Sveinbjörnssonar

Regína Ásvaldsdóttir, bærarstjóri ávarpaði þingfulltrúa á ársþinginu og færði ÍA að gjöf frá Akraneskaupstað kr. 500.000 sem rennur í Minningarsjóð Guðmundar Sveinbjörnssonar. Íþróttabandalag Akraness þakkar bærarstjórn rausnarlega afmælisgjöf og góðar kveðjur. Fjármunirnir verða nýttir til að efla uppeldis- og afreksstarf í íþróttum.

Jón Þór íþróttafulltrúi hættir störfum

Nú í vor verða skipti á íþróttafulltrúa hjá ÍA því Jón Þór Þórðarson hefur ákveðið að hætta í starfi sínu og hverfa til annarra verkefna innan bandalagsins. Jón Þór hefur starfað hjá bandalaginu í tíu ár og verið vakandi og sofandi yfir starfi okkar. Við viljum nýta þetta tækifæri og þakka honum sérstaklega fyrir góð störf og fögnum því að hann skuli ætla að halda áfram að starfa með okkur sem virkur félagi.

Nú er hefur starf íþróttafulltrúa ÍA verið auglýst laust til umsóknar og er reiknað með að nýr aðili hafi tekið við í byrjun sumars eða um mánaðarmótin maí júní n.k.



Gott rekstraruppgjör hjá Íþróttanbandalagi Akraness

Á liðnum árum hefur ÍA lagt mikla áherslu á að hafa fyrirmyndar rekstur og halda vel utanum öll fjármál íþróttahreyfingarinnar. Eftir hrun hefur bandalagið farið í gegnum öll rekstrargjöld og aðildarfélög lagst á eitt að nýta mannskap og tæki eins og mögulegt er. Öll þessi vinna ásamt mikilli velvild Akraneskaupstaðar, fyrirtækja sem styrkja bandalagið og einstaklinga skilar nú glæsilegu rekstraruppgjöri. Þess má geta að öll aðildarfélög ÍA tókst að skila rekstri í jafnvægi sem er frábær árangur við erfið rekstrarskilyrði. Íþróttabandalag Akraness skilar auk þess hagnaði en heildartekjur voru rúmar 29 milljónir en rekstrargjöld rúmar 22 milljónir. Hagnaður liðins starfsárs er því 7.762.327 kr.

Þessi staða gerir ÍA kleift að auka stuðning við einstök aðildarfélög og ráðast í frekari endurbætur og uppbyggingu á íþróttaaðstöðu. Endurnýja tæki og tól og efla félagsstarfið enn frekar. Heildareignir ÍA eru nú samkvæmt efnahagsreikningi metnar á rúmar 70 milljónir króna.



Vöxtur og afl ÍA vekur athygli

Sá vöxtur sem er í íþróttastarfi á Akranesi hefur víða vakið athygli. Mörg íþróttafélög og svæði fóru illa út úr hruninu og hafa ekki náð tókum á rekstri sínum síðan. Skuldir íþyngja mörgum félögum og rekstrarkostnaður er umfram rekstrartekjur. Þá hefur rekstur sveitarfélaga verið mjög erfiður og stuðningur við íþróttastarf dregist víða mikið saman. Sú er reyndin hér á Akranesi en Akraneskaupstaður hefur ekki haft svigrúm til að styrkja íþróttafélögin eða byggja upp ný íþróttamannvirki eins og vilji stendur til. Framlög Akraneskaupstaðar til íþróttamála eru nú lægri en í þeim sveitarfélögum sem við miðum okkur almennt við. Sveitarfélagið okkar hefur þó í gegnum tíðina staðið vel að íþróttamálum eins og glæsilegt íþróttastarf ber glöggt merki um. Styrkur íþróttastarfs hvílir á góðum grunni. Lykill að velgengni okkar rekstrar- og félagslega liggur í samstöðu og samvinnu. Bæði milli aðildarfélaga og í góðu samstarfi íþróttahreyfingarinnar og bæjaryfirvalda. Lán okkar liggur í að allir aðilar hafa lagst á eitt að spila úr erfiðri stöðu. Öflugt og hæft fólk fer fyrir ólíkum íþróttagreinum og aðildarfélögum. Sjálboðaliðar sem sýna ábyrgð og aðhald í rekstri og eru meðvitaðir um gildi samvinnu góðrar liðsheildar.

Þessar áherslur og viðhorf innan ÍA höfum við orðað svo:

Að koma saman er byrjun,

Að vera saman eru framfarir,

Að vinna saman er árangur.

